

Visoki predstavnik preduzeo aktivnosti na zaštiti bh. imovine

Visoki predstavnik Paddy Ashdown je danas donio državne i entitetske zakone kojima se privremeno zabranjuje raspolaganje državnom imovinom na cijelom području Bosne i Hercegovine. Visoki predstavnik je preduzeo ove mjere da bi zaštitio bh. imovinu. To je postalo hitno pitanje u svjetlu činjenice da su zakoni nedavno usvojeni u Parlamentu Federacije olakšali prodaju državne imovine koja je data na korištenje Ministarstvu odbrane. Rasprodaja u ovoj fazi bi mogla besmislenim učiniti rad Komisije za državnu imovinu, kada bude osnovana, pošto postoji opasnost da će do početka rada Komisije ostati vrlo malo imovine koja bi bila predmet razmatranja. Pored toga, bh. državni službenici nemaju dovoljno uredskih prostorija, a ogromne sume novca se godišnje troše na iznajmljivanje uredskog prostora.

U pismu upućenom članovima Predsjedništva BiH u kojem ih informira o ovoj odluci visoki predstavnik je naveo da je bilo neophodno da djeluje u cilju zaštite državne imovine. Odlukom se « čuva u ime države pravo na vlasništvo i upravljanje kako bi odgovarajući organi vlasti – Komisija za državnu imovinu – mogli obavljati svoj rad uvjereni da ova imovina neće biti rasprodana, a građani Bosne i Hercegovine mogli biti uvjereni da nedolična privatna dobit neće biti stečena na osnovu javnih dobara».

U ovom trenutku se državna imovina može prodati bez obzira na rad Komisije za državnu imovinu. A mnogo državne imovine još uvijek nije propisno identificirano ili regulirano.

Kao dio sporazuma iz oktobra prošle godine Vijeće ministara se obavezalo da će sa entitetskim vlastima dogovoriti

zamrzavanje prodaje državne imovine, ali to nikada nije učinjeno.

«Namjera ove odluke nije da odluči o raspolaganju imovinom države,» navodi visoki predstavnik, «nego da ostavi mogućnost bh. vlastima da donesu te odluke».

Komisija će omogućiti sistemski pristup u rješavanju pitanja državne imovine i neće zaustaviti proces privatizacije.